

盧龍縣志卷十八

仕蹟

金

趙思文平州人累官至禮部尙書時朝廷多難思文在閒關羈旅之中未嘗墮於非禮時人稱之

明

邵儼盧龍人永樂癸卯舉人石州同知陞南京戶部郎中歷任陝西右參議文章政事鄉邦所稱子瑄歲貢知朝城老成謙謹以行誼著父子祀鄉賢祠孫鶴年嘉靖戊子舉人知岢嵐州謝政屢空有祖父之風

唐福東勝左衛世襲指揮中景泰庚午舉人孝友慕義歷知隨濱通三州有清白聲嘗鑄祭器以供聖祀加四品服俸九年考滿陞萊州知府未任卒祀鄉賢

李勝景泰辛未進士授御史陞河南按察僉事所至慍然發摘如神訟無冤滯

張廷綱字朝振登成化壬辰進士授行人賜一品服使安南回太監汪直執送西廠獄

未幾廠革各散去罷歸纂府志

李時其先鳳陽人有御史公謫爲盧龍民子從義以靖難功爲永平衛中所試百戶五世至凱凱生時父產悉讓諸兄獨養老母中成化丁酉舉人知岢嵐州八年廉平多惠政民俗因財退婚曲爲解諭完聚吏卒鰥者捐俸修禮以配之論財之俗爲變陞漢中府同知在任六年陞知平涼府持守不渝忤逆瑾改恩州府又謫以前任庫藏不明落職追問踰年乃白補思恩府行至南寧中瘴癘卒於塗二子充濁充拙另傳

楊潤成化癸卯舉人任華亭縣教諭陞知金州剛方廉潔德政著聞

朱鑑字紹熙其先揚州海門人永樂二年遣富戶實北邊遂僑居盧龍之北鄉從遷者八戶因名其地曰八家寨始祖自名再傳至善生有即鑑父天性孝友坦直積粟三千斛嘗貸嫗鄰不取息鑑登宏治己未進士授刑部主事正德中劉瑾擅政舉朝獻媚者十之九鑑處之坦然正直不阿陞至員外郎中出爲建寧知府居官嚴明果斷不受屬託郡人有神明之頌以母憂歸服闋補青州府知府在任五載其治如建寧致政還家村居不事交接居左建一小樓門前有井婦女非裙裳不敢至井汲里中嚴憚之如王

彥方云子三伊廩生似早卒侶以貢生爲肥城訓導

王翊字汝溫登宏治己未進士授兵科給事中督工泰陵中使董役者剝削軍士伐近陵山木代薪以規利劾之伏辜陞工科左給事中徽州有豪族爭訟數年不決命勘遂得其情改御史覈應天諸郡公藏知府某不職懼得罪密以金餽即發其贓私罷之陞刑科都給事中武宗鋪宮奏省費數千金以濟邊餉陞順天府丞歲荒餓殍載途竭力賑活甚衆陞都察院左僉都御史提督雁門等關兼巡撫山西歲宗室驕橫以法權要規鹽利者峻拒之闔境肅然會敵分路入寇督兵禦之寧武關將吏以逗留失利劾其罪械繫京師因自劾並三邊撫臣俱左遷尋降浙江左參議豪民有匿租數十載躬履畝得數百頃爲公稅孝豐有作亂者遠近騷然衆議調兵剿之請先往至解散陞河南右參政分守南陽捕浙川礦賊乃別脅從若干值盛寒多凍餒死悉活以粥遣之陞左僉都御史巡撫山東擇有司佈各郡審編戶則以均徭役王師討逆濠道經齊魯籌芻糧供億兵皆無敢犯及六飛南幸有司預集夫役數萬候境上疫作且乏食悉散歸第令及期無誤活者不可勝計鎮守指以供御大肆科索翊正色責之欲繫以笏乃止陞

右副都御史巡撫陝西秦中宗室蕃衍祿每不給爲有司累令多方務積折補其數上下稱便河湟黠寇欲南下牧馬督固原將士嚴兵禦之遂遁歸略無所失邊民安堵陞南京大理寺卿擢兵部右侍郎卒賜祭葬於城東蓮花源之原崇祀鄉賢子二長道平陰國子生

廖自顯字德潛家貧力學以廉恥自持登正德辛巳進士知潁上縣賑饑活數萬人陞御史視通州倉革中官監收弊按宣大劾鎮將科斂及殺降冒功山西巡撫與參議以小嫌爭忿劾罷之嘉靖庚寅鎮守建昌太監缺疏請裁革遂更遊擊將軍一時稱便出按山東巡撫邵錫清德藩軍校詭冒不從毆府卒乃劾其長史承奉官爲所中錫罷待罪出自顯知汝寧府二載持法不撓罷歸居家二十四年日與故人徜徉東郭蓮池芝隴間有拾燼集放言憫遺集從姪際可進士獻可舉人不急仕進三十餘年銓知即墨旋垂囊歸亦里中高士云

趙得佑御史忠之曾孫三歲失恃長爲諸生遭鄰人橫逆而讀書自如人服其雅量登嘉靖癸未進士甫三月授陝西道御史巡按應天掌南京畿道嚴察蘇松等府案牘及

糾劾輔臣羣黨側目外轉貴州僉事未幾以邊材調遼東再調山西兵備分巡冀南道轉貴州畢節道陞山東參議分守遼海東寧道陞陝西副使備兵肅州其在貴州邵金而服蠻苗及撫哈密酒泉頌之陞陝西行太僕寺卿致仕歷任二十七年以清介終林居泊然宅室敝陋郡守紀公巡以罰鍰置瓦甍於城局將爲葺之得佑聞而艷然曰得佑薄宦時無敢取一介恐虐地方今顧累及桑梓邪卒邵之年七十三卒

闕傑嘉靖乙酉舉人任荊州府推官以治行行取授石州知州遂辭歸耿介自好足不履城市者二十餘年

程畜德剛正有執持以貢爲嵩縣訓導藁城教諭不責贄儀士敬憚之

李充濁字澄之時之子嘉靖丙戌進士知葉縣收黃山巨寇民爲立生祠與楚葉公漢王喬爲三令祠擢爲禮科給事中屢上封事陞浙江右參政改補河南修築隘口自順德界抵山西延互九百餘里陞陝西按察使辨宦室子弟五人積冤陞河南右布政轉左尋改貴州賑銅仁荒歎活萬餘人募民以備苗變罷歸於城北營萬柳莊與故人爲飲社卒祀鄉賢弟充拙字遺之嘉靖乙酉舉人與兄同榜知陳州俗刁滑多出入公門

以擾害鄉民號爲挂答羅織久莫能去下車訪首罪杖殺之餘悉逃散尋以母憂去補知南通州政平訟理卒於官充濁子瀾字伯通處世閱以謹儉稱由歲貢授郟城縣丞郟稱難治民流稅通瀾於荒田立官莊捐俸創廬舍三十餘區號爲俸餘官莊買牛給種招集逃民耕墾收穫足公稅及傭值外餘入義倉備賑公私稱便民亦復業銓部廉其賢擢知郟城靖未踰年辭官歸

韓梅字應元嘉靖戊子舉人任大同同知六年廉平多惠有范驛丞死於官妻流落粥女爲婢梅捐俸贖歸其母居家惇倫任質鄉嘗稱之

王大用東勝衛人登隆慶戊辰進士授扶溝知縣執法無所阿當路銜之左遷東平州判陞滕縣令明習吏事每事必探弊端有大璫進貢折辱驛官索乾沒大用詣郵亭令開篋驗之皆胖襖遣人收捕其解戶於獄大璫甚懼求免其明練肩事類如此陞大理寺評事改戶部郎中歷官遼東陝西參政兩縣並祀之

韓應奎號東軒應庚季弟爲童子饁田之暇輒手書讀中隆慶庚午鄉試五試南宮始謁選得華陰縣知縣有惠政歷蓬萊樂安溫三縣皆以治績聞年未衰即歸田常以睦

族濟人爲念絕不干有司歲大凶施粥賑饑給裘禦寒邑人德之二子長原濟倜儻不羣仲原潔篤信秉禮並諸生濟子乾業潔子坤業庚午兵變長與仲偕亡

韓應庚字希白世有隱德曾祖文富而好施祖誠益大其業嘉靖中歲屢歉先後貸鄉人粟至二萬石不責其償父廷義生而英敏通百家衆技嘗擒巨寇以靖一方封監察御史三子應庚其長也少勵清操登萬歷丁丑進士授彰德府推官其治務廉明寬厚下車取沈獄驗問數日間決斷殆盡受領新訟遣當直設竈公署前呼對簿者自炊未及餐而事已判矣入爲福建道御史出按甘肅值大稔不俟命即發倉粟以賑再按山東鋤强豪黜貪墨出死囚二百六十餘人時年四十七即引疾歸日與親故徜徉山水間於南二十里石磯上築室名釣台以圖書花鳥自娛七徵不起從不干有司遇不平事輒爲代白聞者敬信歲甲辰饑輸粟公府而施糜掩骼無虛日又鬻負郭田數百畝以贍郡邑兩庠貧士年七十有四卒祀鄉賢

朱文運侶子萬歷己丑進士任丹陽知縣勵精撫字政簡刑清邑紳大司馬姜公欲改運河於城外以興貿易運恐勞民固執不從後五年考績稱最竟遷南戶部主事時人

爲之不平至任六月奉差入都因歸省母卒於家子方九齡宦囊蕭然繼室李氏課子治家不墜先業子濟美廩生亦以篤行稱

陳王庭字心龍登萬歷丁未進士初任陝西雒川令清慎儉約凡錢穀訟獄剖斷如流吏不敢干以私雒川素號繁劇民玩吏刁前後令斯邑者往往束手王庭至令行禁止風俗一變歷陞至太僕寺鄉天啓中魏璫用事矢貞不附先嘗巡按遼東得將士心遼失收養全活甚多庚午城陷王庭服堇幾死復甦爲黃冠大師祖大壽張存仁輩皆伏拜牀下報德恐後事平論者議其不死逮獄絕粒而殞

韓原善字繼之別號鵬南父應箕字希皋應庚之次弟也負文武才兼精騎射倜儻尙義有古俠客風嘗出兩嬰孺於劇盜手凡疏族貧交待以接火者恒數十人構宗祠修世墓繕義塾動費不貲無幾微慙色以明經入對大庭不仕原善生而穎悟沈酣經史旁及青烏黃石奇門遁甲諸書靡不研究登萬歷丁未進士授青浦縣知縣吳淞久塞震澤澱湖之水合流東下民苦昏墊爲請賑請蠲平糶設粥躬行給散卒事無譁者他如裁公正均荒絕開津貼甦塘夫清漕兌無不懇惻周至邑人尸祝之調繁長洲爲吳

郡首邑賦役甲天下又當水陸之衝治之獨遊刃有餘縣田一百二十二萬三千畝自
剏立官甲政在鄉紳詭計花分民戶坐困巡撫徐公請均之原善身任怨勞按畝科差
增役田三萬一千四百七十頃精於造士是歲中鄉闈者十人五年考最稱廉治窩訪
觸忌僅遷戶部郎在縣時父嘗斥產貽之佐廉及轉戶曹父益喜爲能不瘠民以媚當
道也旋丁外艱服闋補兵部東事方棘以不次擢開元兵備拜命疏陳方略八款又言
召募有六難有四易疏入上遂俞發帑金七萬四千抵關門五十日募官兵一千六百
餘名馬六百五十餘騎甫出關而開元報陷乃兼程趨至廣寧先是全遼軍需仰給海
運萊津歲運二十萬卸三頓牛地距遼六百餘里水陸煩費原善冒雪行至海上經畫
以登萊海蓋兩道累年會議不決者定泊蓋套歲節費數千金不市月而完糧二十二
萬丁母艱歸屢薦不起卒原善生平孝友性豪爽有遠略周人之急有如其身所著詩
文八卷奏疏二卷尺牘四卷六壬指掌二卷祀鄉賢

清

孟喬芳字心亭其先永平人世襲東勝衛指揮同知喬芳偉岸善騎射能以一矢墮雙

雁清天聰四年大兵克永平喬芳謁御營朝見上以金卮酌酒賜之令隨諸貝勒駐永平遣人往陽和偵諜明總兵祖大壽亦遣人至喬芳所偵我兵多寡喬芳縛以獻尋隨大軍歸遼陽隸漢軍管佐領事五年授刑部承政予二等輕車都尉世職崇德三年更定官制改刑部左參政四年兼紅藍兩旗漢軍副都統七年隨大軍圍明錦州同都統金礦等克塔山城是年分漢軍八旗喬芳改鑲紅旗副都統後遂爲漢軍鑲紅旗人八月有以貝勒羅洛渾家人奪金事訴者喬芳置弗理坐瞻徇降世職一等十月隨大軍徵明攻前屯衛中後所二城並克之叙功加一雲騎尉順治元年從大軍入關二年四月授陝西總督長安縣妖民胡守龍等造僞印倡亂喬芳遣副將陳德擒斬之閏六月疏言秦省沿明陋習各官蒞任俱有鋪設繁費累百姓請嚴禁詔如所請時流賊張獻忠尙據四川喬芳請於興安駐重兵漢中增設巡撫以扼其衝疏下部議行三年寧夏兵變殺我巡撫焦安民喬芳授計總兵劉芳名斬首惡王元馬德別遣副將任珍陳德王平等勦賊黨賀珍劉二虎胡向宸於興安挫賊衆追斬向宸敗孫守法於椒溝降平天青觜諸寨復遣副將張永劉友元擒賊賀宏器於安家川五年四川流賊一朵雲馬

上飛等犯西鄉縣喬芳遣任珍會漢羌鎮兵馳剿殺僞監軍許不惑及賊衆千餘生擒一朶雲馬上飛尋河西逆回米喇印丁國棟作亂渡河而東連陷郡邑簿鞏昌喬芳率兵駐秦州遣副將馬寧援鞏昌合副將趙光瑞軍與賊大戰於廣武破之逐北七十里遂解鞏昌圍時賊據內官營及岷洮河三州衆數萬喬芳遣軍三路進剿時張勇敗賊於馬韓山光瑞敗賊於梅嶺擒僞將丁光謝寧直搗內官營岷洮河三州皆復逆回退居蘭州喬芳與侍郎額色督兵攻下之喇印國棟皆授撫逾兩月復踞甘州叛甘肅巡撫張文衡西寧道林維造參議張鵬翼總兵劉良臣副將毛賓潘雲鵬等俱遇害喬芳自蘭州渡河馳赴甘州與提督傅喀禪協領羅畢大總兵齊陞等四面合攻不下深溝高壘以困之賊食盡援絕乃宵遁喬芳遣兵馳剿喇印於水泉國棟復與纏頭賊土倫泰等踞肅州出梗武威張掖酒泉地喬芳遣張勇馬寧等攻破肅州擒倫泰國棟誅之六年八月大同叛鎮姜瓖黨虞允韓昭宣等糾衆三十萬陷蒲州及臨晉猗氏等縣喬芳同額色奉命赴山西會剿自潼關渡趨蒲州殲賊略陽遂進兵臨晉猗氏斬僞帥白璋擒僞監軍道衛登方復遣協領根時參領都敏副將狄應魁趙光瑞等分剿敗賊斬

虞允韓昭宣猗氏解州榮河等城俱復乃還軍十二月興安賊何可亮踞箭峪階峪出入剽掠喬芳遣任珍剿平之七年遣寧光瑞等剿賊于合水縣斬賊渠劉宏才擒其僞軍師苗惠民八年遣遊擊陳明順敗賊何柴山于商州維南縣時賊渠孫守金糾川湖諸孽踞紫陽山寨喬芳先令遊擊仰九明偵防復遣光瑞往會興安鎮兵合剿擒斬僞將軍翹興趙定國謝天奇等梟其巢九年入覲加太子太保詔馳驛還西安先是叙平回賊功加兵部尙書銜晉世職爲一等輕車都尉至是兩遇恩詔晉三等男十年二月命兼都四川兵馬錢糧疏請以重兵鎮守保甯漢中分步兵五千興屯廣元昭化之間俾兵食有賴又請於陝西四鎮分步兵二千給帑備牛種墾荒田下部議行五月疏言大軍規取全蜀宜隨在留兵駐防以樹干城而謀生聚至進征之兵請每名給馬三匹伴丁一攜甲杖以利攸往得旨悉心籌畫具見爲國忠誠深可嘉悅十月西寧孫家寨回民謀不軌喬芳遣狄應魁馳剿擒賊渠郝敖牙回子等餘黨悉平十一月引疾乞休詔以原官加少保馳驛回京十一年卒遣內大臣奠茶酒加贈太保賜其家白金千兩

住宅一區予祭葬如例諡忠毅年六十雍正十年詔入賢良祠子熊弼襲世職

參錄清史

蔡士英字伯彥號魁吾漢軍正白旗人其先以軍功襲錦州左屯衛千戶清順治元年二月授佐領尋署參領六月隨都統石廷柱往山東遇濟陽土賊掃地王康玉環擁衆數萬阻道剿平之擒斬玉環尋隨都統葉臣招撫山西以紅衣炮攻太原府敗僞伯陳永福兵二年隨英親王阿濟格征陝西擊流賊于延安府城下隨貝勒博洛征浙江進定福建五年授都察院左僉都御史遷副都御史六年任正白旗漢軍副都統隨巽親王滿達海征叛鎮姜瓖復朔州及汾州府城九年四月授江西巡撫時廣西土賊楊文等集浙閩流亡踞九仙山肆掠旁邑袁州吉安土賊劉京李文斌受明桂王朱由榔僞侯爵糾衆陷安福永新諸縣士英至與提都劉光弼會商援剿遣遊擊岑應元等率師擊賊衆復安福永新李文斌劉京先後擒斬遂遣參將陳陞等會同浙江官兵攻破九仙山賊寨楊文中炮死降其弟楊富等餘衆並受撫又僞總兵霍武結連福建逆寇周立滋擾江西僞都督曹志攀僞總兵汪文生先後糾賊犯饒州廣信士英檄兵征剿復遣湖東道安煥通判張羽明等諭降之先是江西巡撫夏一鶚請豁荒田稅糧部議令覆加察核至是士英疏言江右連年兵燹加以天災流行死亡相枕腴產拋荒前撫臣

夏一鶚疏報全省荒歉及今覆察比前較多因前此或地爲賊踞今始恢復或民徙他鄉今始歸來有闔門遭戮開報無人者又有誤聽傳訛恐報荒即作官田者竟有未報之數臣思有荒而不除除之而不盡非所以廣布皇仁今十三郡所屬尙多寇盜良民甘心相從正以今日歸來明日即追徵荒逋故寧從賊而不悔耳且貪官污吏因荒熟未分始則借荒爲口實繼則緣荒而作奸牽混不清窮民徒受催科之苦究無補於國用朝廷亦何樂有紙上之虛數哉惟除荒一舉不過減有名無實之浮額自此按冊而征無所託詞再督勸開墾遵例起科數年之後可以仍完原額臣委員遍行踏勘通省荒蕪確數實十萬七千五百餘頃較前撫臣所報多二萬五千六十七畝有奇伏乞恩準豁除國計民生兩有攸賴疏入得旨允行又江西右布政使莊應會奏袁州瑞州二府科糧獨重請減浮額下士英確勘疏言袁瑞多山素稱瘠土自陳友諒竊據時因壤紉借証明洪武初奸民黎伯安抱冊以獻沿襲不改較元至治閑額徵浮倍視臨江吉安等府亦輕重懸殊應從減原額每畝九升三合起科以蘇積困奉旨浮糧積久重困一方應從原額減免無踵弊混徵士英又因工部議令察勘廣信府之封禁山可否採

木疏言封禁山初名銅塘因其峭險屢爲盜藪削平之後即封禁亦稱封禁山唐代黃巢倡亂其黨藉爲穴窟流毒一方明嘉靖間奸民葉宗留賃居燒炭謀爲不軌鄧茂七爲之附援三省搖動幾危信州邇爲山賊楊文竊踞甯謐未久恐啓奸謀請敕禁開採詔從之十二年擢漕運總督明年疏言舊例本省丁船協運他省糧務未免稽延請改撥就近官丁領兌又言海州先遭兵火致多無主荒田已入新墾冊報原額正供錢糧無憑徵解請旨豁除並刊正賦役全書以示久遠事皆下部議行十四年因病解任十六年病痊復授漕運總督先是順治二年設鳳陽巡撫駐秦州六年因標兵調赴廣西裁巡撫歸漕運總督管理至是士英以海防漕務勢難兼理請仍舊制于是復設鳳陽巡撫士英專理漕務十八年以疾致仕康熙十三年三月卒賜祭葬如典禮謚襄敏祀江西名宦淮安士民亦建祠祀之四十四年上南巡過淮安御書奏績東南以額其祠

子四長毓貴早世次毓榮另有傳次毓華遵義府知府季毓茂京口副都統

參錄清史

蔡毓榮號仁菴襄敏公次子也初任佐領兼刑部郎中尋授京畿道御史兼參領順治十七年隨征楚寇又調征鄭國信海氛既靖紳士多罹僞籍毓榮矜釋甚衆有宦者橫

於市執而撻之詔問狀俯對曰臣何敢撻宦者撻虐民犯法人耳由是聲振京師康熙元年遷秘書院學士五年授刑部侍郎七年遷吏部侍郎九年授四川湖廣總督駐荊州陞見時上親解御袍賜之著體猶溫十年疏言蜀省民少田荒宜廣招墾凡候選及現任人員招民三百戶者議叙即用即墾墾熟田畝寬限五年起科又言蜀省衝要營員請照沿邊例題補十一年疏言移駐弁兵其子弟有讀書者應準入籍考試十二年請裁遵義總兵官改鎮松潘事並下部議行是年十二月逆藩吳三桂反毓榮疏言雲貴總督甘文焜手書遺臣言三桂反臣隨調沅州總兵官崔世祿疾赴貴州禦之令彝陵總兵徐治都永州總兵李芝蘭各率兵繼進上諭以宜令提督桑額疾馳沅州固守勅遣王貝勒大臣領八旗兵至荊州復命侍衛納爾泰傳諭毓榮籌備軍需十三年二月分設四川總督改毓榮專督湖廣以前招民墾荒叙功加兵部尙書銜先是賊兵陷沅州崔世祿降賊至是常德澧州長沙岳州相繼失守部議革職命留任戴罪圖功尋丁父憂命在任守制仍率綠旗兵偕八旗兵進剿毓榮遣中軍副將胡士英等分防江口值叛鎮楊來嘉等踞南漳縣之天門寨馬良坪諸處出掠城邑毓榮遣襄陽總兵